



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : FANLING PUBLIC SCHOOL

學校名稱 : 粉嶺公立學校

Name of Play 劇名 : 疫情奇想曲

Script writer 劇作者 : 梁國雄主任、張淳雅老師

Synopsis 故事大綱：

疫情令人與人之間的關係產生了微妙的變化，也將怪獸家長一直堅持的「贏在起跑線」提升至另一境界。

一個夢，讓女兒明白相互體諒和付出，能令家庭和諧；

一封信，讓父母與女兒展開真情對話，打破家庭隔膜。

梁伯和舒澄告訴我們，彼此設身處地去想，耐心聆聽對方感受，就是通往幸福之門的鎖匙。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

【第一場】

(放學鐘響起.....)

廣播聲：因疫情關係，教育局宣布全港學校停止面授課，同學由聽日開始留係屋企學習，為咗自己同其他人嘅安全著想，記得盡量避免到人多擠逼嘅地方，並注意社交距離..... 老師再見、同學再見.....

(各人在不同的區域說出一些疫情下的學習態度)

同學 A：一張書枱、一部舊電腦、一對耳機、一盞檯燈，我喺疫情下嘅學習生活就喺咁樣開始。

同學 B：疫情就像一陣風，無聲無息咁吹入我哋嘅生活，其後愈演愈烈，擾亂每個人嘅心神！

同學 C：望住老師、同學嘅面孔變成手機螢幕上一個個圖示同名字，既熟悉又陌生。

同學 D：冇錯呀，上堂、做功課、溝通等通通要靠呢一個小小螢幕完成，有時候真係眼花繚亂，無所適從。

同學 E：最令我激氣嘅就係交功課嘅時候，網絡突然卡住咗，又要重新做過。

同學 F：唔單止呀，分組討論全部都係網上進行，學生上堂和課外活動都係「聯網」學習。

同學 G：對於人類世界嚟講，疫情對人與人之間嘅關係產生咗微妙變化。

同學 H：但對於怪獸家長嚟講，疫情只會係佢哋新常態下另一個競技場。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

【第二場】

(家中)

旁白 A：因為疫情不穩嘅關係，教育局限制只有部分學生可以回校上課，其他同學就要留係屋企上 ZOOM，上完一個上晝嘅堂就無所事事啦。

旁白 B：我唔會比我個小朋友無所事事，佢地中午補完中英數，下晝就學彈琴書法。夜晚就做網上功課同溫默書。

旁白 C：冇錯，疫情之下每日嘅行程都排得密密麻麻。因為社會對「未來棟樑」嘅要求好高，希望子女都十項全能，喺疫情下成績都唔會落後於人。

爸爸：我係爸爸，「贏在起跑線」係我最鍾意玩嘅一個遊戲，揀個 BB 角色就可以比賽㗎啦，玩家就要從小培養佢成才……一出閩嘅時候……呀！唔係，喺一出世嘅時候，BB 就要快速成長啦，未學行就要學識帶口罩預書包，你睇佢地個個幾咁精靈醒目呀，一定唔會係確診 B！佢地帶住口罩跑呀跑呀，谷曬啲成長基因出嚟，嘩！打波跳舞、琴棋書畫樣樣識呀！嗶嗶嗶……最緊張嘅時刻到啦，究竟 3 隻馬仔……呀唔係，係 3 個人仔係龍係鳳定係蟲呢？呀！沖線啦！獎牌多到阿媽啲 face 返曬嚟呀！

媽媽：老公乜你個 Game 咁唔人道㗎，啲小朋友打波跳舞都帶住口罩…

爸爸：咩呀，你有聽過喺疫情下出門帶口罩係「理所當然」；市民出入店舖量體溫都變成「日常」，望子成龍係天經地義。

媽媽：就算冇疫情，我都係咁幫個女鋪路㗎啦！宜家個個家長都係咁㗎啦！

婆婆：（對紆澄說）你媽咪以前唔係咁㗎，係做咗人阿媽先變成咁咋；疫情之下，仲更加緊張。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

(婆婆望着遠處，媽媽和鈺澄進入另一場景)

媽媽： 阿女，起身食早餐啦！香腸加雙蛋，食左就科科考 100 分。嘩，你仲喺張床度呀，快啲快啲，快啲起身呀！

(鈺澄在床上繼續睡)

鈺澄： 得啦。

媽媽： 阿女，你估我買咗咩比你？無錯呀，就係網上補充練習試題庫啦！集齊全港出版社，中英數常辦辦齊。

鈺澄： 得啦，得啦，得啦！(起身著衫梳洗) 媽咪，今個星期六呢我想去.....

媽媽： (邊幫忙邊念念有詞) 呀!今日放學後 3:00 你要去上**鼓班**，4:30 要上**數學解難班**，5:45 要學**英文拼音**呀，7:00 要去**學游水**.....全部都係上網課，Zoom ID 同埋 password 已經按時間編排列印好，釘咗喺書房嘅 notice board。

鈺澄： 媽，乜上 Zoom 都可以學游水㗎咩？難道我要幻想個書房係游泳池？

媽媽： 喺新常態下屋企都可以變做模擬課室啦！

鈺澄： 媽咪今個星期六，我想同啲同學去行山，呼吸吓新鮮空氣，吹下泡泡，放下風箏！

媽媽： 唔得呀! 星期六你個 Zoom training schedule 已排得密密麻麻，除咗返學，其他時間就乖乖啲留喺屋企，聽講隔離 B 座又有人『中招』啦！

鈺澄： (發悔氣地) 星期一中國舞拉丁舞，星期二跆拳道泰拳，星期三鋼琴小提琴，星期四單雙簧管加鼓班，星期五六日就得閒啲！補中英數常！媽，難道喺你眼中就只有呢啲？